


南唐繹史勸本

第十四册





五	漢書門
一	
六	
八	
七	
册架函號類	

庫文閣內			
八	五	漢	
函	一	書	
二	二		
三	七	類	
架	册	號	

內閣文庫	
番號	漢 5117
冊數	16 ( 14 )
函號	288 191

南唐繹史勸本





繹史摭遺卷三目錄

吳郡李

瑤子玉纂

列傳三

陳子壯

張家玉

陳邦彥



蘇觀生

霍子衡

梁朝鍾

右閩粵義臣列傳摭遺第三

繇唐王而下臣於永明而未嘗登朝者列此所謂義臣者如義帝之義也唐王弟聿鏞竊據廣州事於觀生傳中附見



釋史摭遺卷三

列傳三

陳子壯字集生南海人萬厯己未進士第三人授翰林編修天啓甲子科典浙江鄉試發策刺奄魏忠賢怒假他事削其籍并免其父吏科都給事中熙昌官崇禎初子壯起故官累遷吏部右侍郎流賊犯皇陵帝素服召對廷臣因對今日所急在收人心宜下罪已詔激發忠義納之乃會同列上蠲租清獄使過省臯等十二事尋以海內多故帝思廣羅賢才詔援祖

訓郡王子孫文武堪用者準攷驗授職子壯慮後患  
立陳五不可會唐王聿鍵引前代故事詆之遂除名  
下獄坐贖徒歸已用薦起官協理詹事府未赴南都  
立以禮部尙書召至蕪湖而南都失守乃馳還時桂  
王常瀛避難梧州子壯謂王神宗子宜立總督丁魁  
楚方集衆議而唐王已立於福州矣議遂寢唐王召  
相子壯以前議宗室有宿憾辭不行丙戌汀州破桂  
王子永明王由榔爲丁魁楚等擁立於肇慶蘓觀生  
又議立唐王弟聿鏞子壯沮之不得遂退居南海之

九江村永明王授以東閣大學士兼兵部尙書總督  
福建江西湖廣軍務

大清兵入廣州聿鏞被執歿子壯止不行明年春張  
家玉陳邦彥及新會王興潮陽賴其肖先後舉兵子  
壯亦以八月起兵九江村兵多蛋戶番鬼善戰乃與  
邦彥約共攻廣州結故指揮楊可觀等爲內應子壯  
兵先至城中不敢動事洩可觀等歿子壯退駐五羊  
驛時我

大清遺降將李成棟攻張家玉於新安及邦彥至與

子壯謀伏兵禺珠洲側伺成棟還救會城縱火以焚其舟已軍以青旂朱旂爲號子壯如計果焚舟數十成棟走下風引而西邦彥尾之會日暮旂幟不能辨皆疑爲敵舟陣動風忽轉大兵乃順風返擊大潰長子上庸歿焉子壯走還九江村會故御史麥而炫破高明具書來迎子壯至以故主事朱實蓮攝縣事九月高明破實蓮戰歿子壯而炫俱被執械至廣州勸之降不從遂被僇子壯母自縊永明王贈番禺侯謚文忠蔭子上圖爲錦衣衛指揮使而炫字闇章高

明進士歷官上海安肅知縣唐王時爲御史實蓮字子潔由舉人歷官刑部主事爲子壯邑子也

張家玉字子元東莞人崇禎癸酉進士授庶吉士闖賊陷京師被執不能歿上書于賊請旌巳門爲翰林院庶吉士張先生之廬請褒卹范景文周鳳翔等隆禮劉宗周黃道周尊養史可程魏學濂自稱殷人從周願學孔子稱李自成大順皇帝自成怒召之入長揖不跪縛午門外三日復脅之降恠以極刑卒不動自成曰當磔汝父母乃跪時其父母在嶺南而遽自

屈人咸笑之賊敗南還阮大鍼等攻其薦賢於賊令  
收人望集羣黨遂被逮南京破脫歸從唐王入閩擢  
翰林侍講監鄭彩軍出杉關謀復江西解撫州圍丙  
戌聞大兵至彩卽賁入關家玉走新城與知縣李  
勳共城守兵至出戰中矢墮馬折臂走入關尋以右  
僉都御史巡撫廣信廣信已失請募兵惠潮說降山  
賊數萬將赴贛州急會汀州破乃還東莞明年與舉  
人韓如璜結鄉兵攻東莞城知縣鄭霖降籍前尙書  
李覺斯等貲以犒士甫三日而大兵至衆敗走知

永明王立奉表賀進兵部尙書無何兵至戰又敗如  
璜歿家玉走西鄉祖母陳母黎及妹石寶俱赴水歿  
妻彭被執不屈歿鄉人殲焉西鄉大豪陳文豹奉之  
取新安襲東莞戰赤岡大兵大至攻數日復敗走  
鏡岡文豹等皆歿覺斯怨家玉甚發其先壘毀其家  
廟盡滅其族村市爲墟家玉過故里號哭而去途次  
得衆數千取龍門博羅連平長寧攻惠州克歸善還  
屯博羅大兵來攻乃走龍門復募兵萬餘人分其  
衆爲龍虎犀象四營攻據增城十月大兵以步騎

萬餘來擊家玉三分其衆犄角相救倚深溪高崖以自固大戰十日力竭而敗圍數重諸將請潰圍出歎曰矢盡砲裂欲戰無具將傷卒斃欲戰無人烏用徘徊不決以頸血濺敵人手哉因徧拜諸將自投野塘中以歿年三十有三永明王贈少保武英殿大學士吏部尙書增城侯諡文烈其父兆龍猶在籍以子爵封之

陳邦彥字令斌順德人爲諸生時意氣豪邁福王立詣闕上政要三十二事格不用唐王讀而偉之旣自立卽其家授監紀推官未任舉於鄉以蘇觀生薦改職方主事監廣西狼兵援贛州急至嶺聞汀州變勸觀生東保惠潮不聽會永明王監國肇慶觀生遣之賀王已西走梧州邦彥甫入謁而觀生又別立唐王弟聿鏗於廣州邦彥不知也夜二鼓王遣中使十餘輩召入舟中王太妃垂簾坐王西向坐魁楚侍語以廣州僭立事邦彥請亟還肇慶正大位以繫人心且云彼強我弱以戰則非計彼曲我直以和則非名警報日迫彼若知愚必來求成如其不然則粵東十郡



我居其七委其三於彼以代我受敵我復從而乘其  
敝不亦可乎王大悅立擢兵科給事中令齎敕還諭  
觀生及入境聞殺使臣事因遣從人以敕授觀生而  
致書曉以利害觀生猶豫爰日欲議和旋聞永明王  
兵敗不果邦彥乃變姓名入高明山中丙戌冬廣州  
破觀生歿之列城悉下邦彥謀起兵初贛州萬元吉  
遣族人萬年募兵於廣得余龍等千餘人未行而贛  
失龍等無所歸聚甘竹灘爲盜他潰卒多附之至二  
萬餘丁亥春大兵定廣州克肇慶逼永明王於梧

州抵平樂王走桂林勢危甚邦彥乘間說余龍出圍  
廣州而已發高明兵由海道入珠江與龍會遺書張  
家玉曰桂林累卵但得牽制毋西使潯平間可完葺  
是我致力於此而收功於彼也家玉以爲然大兵  
在桂林聞亂還救揚言取甘竹灘龍卒素無紀律且  
顧其家輒引退邦彥亦卻歸旣乃遣門人馬應芳會  
龍軍取順德戰敗應芳赴水歿四月龍再戰於黃連  
江亦敗殺邦彥乃棄高明收合餘衆據下江門初廣  
州之圍我

大清巡撫佟養甲獲降者訊知謀出邦彥遂襲其家  
執其妾何及二子和尹虞尹厚眎之爲書以招邦彥  
邦彥判書尾曰妾辱之子殺之身爲忠臣義不顧妻  
子養甲壯焉仍以善遇後郡紳李皇一舉人杜璜攻  
肇慶始被殺皇一等亦陣歿秋九月密與陳子壯約  
復攻廣州水陸兼進邦彥後至謀洩不果乃與子壯  
伏兵伺擊以火舟衝之 大兵引却已而乘風夜戰  
大敗奔三水清遠指揮白常燦以城迎奉乃入清遠  
與諸生朱學熙嬰城固守精銳盡喪外無援軍越數

日城破常燦歿邦彥率數十人巷戰肩受三刃不歿  
走朱氏園中見學熙自縊拜哭之旋被執饋之食不  
食繫獄五日被僇永明王贈兵部尙書諡忠愍蔭其  
子爲錦衣衛指揮使

撫遺曰舉九江村之蛋戶番鬼龍門之龍虎犀象  
加以高明山甘竹灘之衆通力合作則珠江上下  
倘可觀邪奉永明而計不自贍不知當時二陳公  
與張先生何徒擾擾爲也夫張文烈近賊而不制  
於賊猶可遜詞希恕其必欲旌此門焉豈不可笑

至後之赤族殷讐旣延祠墓亦良可痛哉其生平  
任俠好擊劍多草澤豪傑交故所至輒能得衆陳  
忠愍亦能與下同勞苦一軍最強起事後日則一  
食夜則假寐待旦誦其義不顧妻子數語直使千  
古同聲一哭陳文忠之典試浙江也丙辰第二人  
江夏賀逢聖同被命得應天偕與出都魏忠賢以  
逢聖不詣謝矯旨追還以侍講李標代之此所以  
有發策刺奄之舉及其集義九江村往來多不如  
志忠愍繫獄歿而文忠亦被執踰月張文烈亦自

沉矣鳴虜

蘇觀生字宇霖東莞人年三十始爲諸生崇禎中由  
保舉授無極知縣遷永平同知監紀軍事已擢戶部  
員外郎京師陷脫走南京進郎中督餉蘇州南京覆  
走杭州謁唐王與語大悅聯舟赴閩與鄭氏兄弟擁  
立王擢翰林學士進禮部右侍郎兼學士設儲賢館  
分十二科招四方士令觀生領之至者多庸流王亦  
厭罷觀生矢清操稍有文學而時望不屬王以故人  
恩眷出廷臣右乃超拜東閣大學士參機務觀生數

贊王出師見鄭氏不足與有爲且事權悉爲所握請  
王赴贛州經畧江西湖廣王議遣之先行明年觀生  
赴贛大徵甲兵饒不繼竟不能出師丙戌三月吉安  
破總督萬元吉乞援乃遣二百人進協守綿津灘戰  
敗大兵圍贛城觀生走南康贛數告急不敢援六  
月兵退屯水西因發三千人馳入贛助城守久之我  
兵再攻三千人皆引去八月觀生移駐南安閩中急  
不能赴救唐王聿鍵歿汀州十月贛州亦破遂退入  
廣州監紀主事陳邦彥勸以疾趨惠潮扼漳泉兩粵

可自保不從會丁魁楚等將立永明王觀生欲與共  
事魁楚素輕之且欲專定策功慮其以舊相居已上  
拒不與議呂大器亦以其出身非兩榜叱辱之觀生  
愠甚時唐王之弟聿錫嗣稱唐王者與大學士何吾  
騶自閩至有番禺梁朝鍾南海關捷先首倡兄終弟  
及議觀生遂與吾騶及侍郎王應華曾道唯布政使  
顧元鏡等以十一月二日擁聿錫爲監國僞號紹武  
就都司署爲行宮卽日封觀生建明伯掌兵部事進  
吾騶等秩旋與應華等竝拜東閣大學士分掌諸部

時倉猝舉事亟治宮室服御鹵簿通國犇走夜中如  
白晝不旬日除官數千冠服皆假之優伶市人傳以  
爲笑永明王立肇慶命給中彭燿主事陳嘉謨齎敕  
往諭燿順德人過家拜先廟託子於友至廣州以諸  
王禮見備陳天潢倫序及監國先後語甚切至因歷  
詆觀生諸人觀生怒執殺之嘉謨亦不屈歿乃治兵  
日相攻以番禺人陳際泰督師與永明王總督林佳  
鼎戰三水旣敗復招海盜數萬以大將林察帥之佳  
鼎故粵中監司與察同姓相善察詐使盜降佳鼎以

爲信十二月二日舟次三山口亂作全軍俱覆佳鼎  
赴水歿肇慶大震觀生意得務爲粉飾太平而惟捷  
先朝鍾是任有楊明競者潮州人好爲大言詭稱精  
兵滿惠潮間可十萬卽特授惠潮巡撫觀生器此三  
人事必咨之又有一梁鑿者妄人也觀生謂其才用爲  
吏科都給事中與明競大納賄賂日薦數十人觀生  
本乏猷畧兼綜內外事益惛瞶所招海盜爲捍衛其  
衆白日殺人剗肺腸懸諸貴官之門以示威城內外  
大擾時大兵已下惠潮長吏皆降埒卽用其印移

牒廣州報平安觀生信甚是月望日聿鏹視學百僚咸集或報

大清兵已逼觀生叱之曰昨潮州報無警烏得遽至此妄言惑衆斬之如是者三兵臨城下觀生猶疑爲海盜已自東門入始召兵亟戰精銳者皆西出倉猝不能集觀生乃走鑿所聞計鑿曰歿爾復何言觀生入東房鑿入西房各拒戶自縊觀生慮其詐稍留聽之鑿故扼其吭氣湧有聲且推几仆地久而寂然觀生信其歿遂自經明日鑿出獻其屍以降聿鏹方閱

射急易服踰垣匿王應華家俄縋城走爲追騎所獲饋之食不食曰我若飲汝一勺水何以見先人於地下遂投繯歿吾騶應華元鏡等悉降

霍子衡字覺商南海人萬厯中舉於鄉除海康教諭彙遷國子助教都察院司務戶部員外郎中出授袁州知府解職歸閩地盡失聿鏹召爲太僕寺卿廣州破語妄莫及三子應蘭應荃應芷曰禮臨難毋苟免若輩知之乎三子皆曰惟大人命子衡援筆大書忠孝節烈之家六字懸諸中堂易朝服北向再拜又易

緋袍謁家廟先赴井妾從之應蘭偕妻梁及一女繼  
之應荃應芷偕其妻徐區又繼之惟三孫得存有小  
婢見之亦從井歿

梁朝鍾番禺舉人善談論與南海關捷先同爲觀生  
所倚捷先由進士歷官監司小有才便筆札倡議同  
擁聿鏞擢爲吏部尙書朝鍾浹旬三遷至祭酒嘗語  
人曰內有捷先外有楊明競強敵不足平也聞變投  
於池爲鄰人救出復自剄捷先出降

撫遺曰假令廣州不殺使臣與肇慶平聯絡高明  
等衆爲犄角勢或可少延喘息奈何登用非類翫  
若戲場觀生一歿且難自決猶須咨及妄人烏足  
以與人家國

天兵下而羣醜盡矣諒哉

繹史披遺卷三終

釋史撫遺卷四目錄

吳郡李 瑤子玉纂

列傳四

何騰蛟

章 曠

傅作霖

周 震

蕭 應

右閩粵督輔從事諸臣列傳撫遺第四

何忠烈公身歷四朝胸藏萬甲戎車載驟宵枕  
无安於全楚疆場之計可謂堅志如城鞠躬盡  
瘁其勛烈固甚偉者矣湘潭空守衆力不齊及



其沒而楚民爲之挂孝舉哀立祠祀焉章侍郎  
本丙子解元熹談兵名重于鄉所著多兵家言  
其佐忠烈軍坎坷不渝收輯降衆繼志恢勦功  
亦良多傳則初埒劉承胤而未能以節自持君  
子取友之道於忠烈從事兩君可見已

釋史摭遺卷四

列傳四

何騰蛟字雲從貴州黎平衛人天啓元年辛酉舉人  
崇禎中授南陽知縣地當要衝流寇出沒卽請諸大  
吏練兵堵勦斬首四百餘級土賊發亦討平之能聲  
大著遷兵部主事進員外郎出爲懷來兵備僉事調  
口北道丁內艱巡撫薦其才將奪情固辭歸服闋起  
原官兵備淮徐擒斬土寇境內肅然癸未冬拜右僉  
都御史巡撫湖廣時湖北盡陷止武昌一郡爲寧南

侯左良玉屯軍所騰蛟之任與良玉交驩一軍帖服  
甲申五月福王立時良玉在漢陽詔至部下有異議  
騰蛟乃以劍自隨曰社稷安危繫此一舉倘不奉詔  
當以此身付三尺劍耳會江督袁繼咸亦以書勸正  
紀盧鼎言於良玉力請開讀如禮正紀者良玉所置  
官名也八月加兵部右侍郎兼撫湖南尋命總督湖  
廣四川雲南貴州廣西軍務乙酉三月南都有北來  
太子事朝議爲僞物論沸然卽抗疏極言不可殺與  
當國者大忤無何良玉舉兵從巡按御史黃澍謀稱

奉太子密詔清君側惡將邀之偕行騰蛟堅不可良  
玉因謀奪其印盡殺城中人以劫之七民思爭匿其  
署遂身坐門屏間聽民入左兵輒破垣縱火避難者  
悉焚歿騰蛟急解印付家人令速出城毋爲所得拔  
劍將自剄左兵擁之去良玉邀與同舟不從因以別  
舟置之以副將四人監之舟次漢陽門乘間躍入江  
四人急且危亦自沉騰蛟漂泊十數里至竹牌門觸  
漁船救之起登岸則漢壽亭侯廟也家人懷印者亦  
在相眎大驚覓漁船忽不見遠近共詫爲神助從者

多歸心焉騰蛟乃由寧州轉瀏陽抵長沙集舊時屬吏痛哭以盟誓圖報復士馬舟車糧餉各自分任權令堵胤錫爲湖北巡撫傅上瑞爲湖南巡撫章曠爲總督監軍周大啓提督學政嚴起恒故衛永道卽督二郡軍食吳晉錫以長沙推官攝郴桂道事就遣曠往諸路調兵副將黃朝宣自燕子窩張先璧自淑浦劉承胤自武岡先後俱至兵勢稍振是時良玉抵九江已歿五月我

大清兵下南都閩中唐王聿鍵立玉居南陽時稔知騰蛟才且賢委任益至旋闖賊李自成敗至九宮山爲村民鉏擊以斃其僞將劉體仁郝搖旂等有衆四五萬以無主將依騰蛟降驟入湘陰距長沙僅百里城中初不知其意思甚朝宣卽率兵還禦上瑞請出避騰蛟曰歿於左歿於賊一也何避爲長沙知府周二南以千人往偵之賊疑來襲射殺之從行者盡歿民益洶洶騰蛟與曠謀以部將萬大鵬等二人持書往撫賊見止二騎迎入演武場飲以酒二人不交一言相與痛飲畢賊問來意二人曰督師以湘陰福小

不足容大軍請卽移駐長沙因出書示之書云公等  
歸朝誓爲永保富貴擢旂等喜卽隨二人至騰蛟開  
誠撫慰宴禮盡驩以牛酒犒其從者命先璧以卒三  
萬出郊馳射旌旂蔽天擢旂等大悅悉招餘黨來歸  
驟增兵至十數萬聲威大振未幾自成後妻高氏與  
其弟一功從子李錦擁衆數十萬逼常德乞撫騰蛟  
馳檄令巡撫堵胤錫往撫之安置荊州復慮錦等跋  
扈難制爰降日過其營請見高氏執禮甚恭高悅戒  
錦毋負何堵二公因是卒無異志錦後賜名赤心一

功賜名必正號其軍爲忠貞營自成亂天下者二十  
年陷帝都覆廟社其衆數十萬一旦盡歸騰蛟無不  
詫爲異事騰蛟上疏但云元兇已除稍洩神人之憤  
宜告謝郊廟卒不言已功唐王大喜立拜東閣大學  
士兼兵部尚書封定興伯仍督楚師而微疑自成歿  
未確騰蛟言自成實歿身首已糜爛不敢居功固辭  
封爵不允且命規取兩江於是部置降卒參以舊軍  
題授朝宣先璧爲總兵官與承胤赤心郝永忠袁宗  
第王進才及董英馬進忠馬士秀曹志建王允成盧

鼎並開鎮湖南湖北間所謂十三鎮者是也永忠卽  
搖旂英志建故中軍餘皆良玉舊將騰蛟銳意東下  
丙戌正月拜表出師赴湘陰期大會諸鎮觀望不進  
獨赤心自湖北至遇大兵三戰三北而還諸鎮兵  
遂罷騰蛟威望亦頓損諸鎮日漸驕橫且貪殘朝宜  
尤甚劫人每剥其皮永忠效之皆不能制王數議出  
關爲鄭氏所阻騰蛟屢疏請幸贛州協力以取江西  
王遣使徵兵乃令永忠以精騎五千往永忠逗遛鈔  
掠而已會

王師破汀州唐王被執歿贛州亦失騰蛟聞之大慟  
哭厲兵保境如常旣而永明王立詔至乃稍安王以  
爲武英殿大學士加太子太保騰蛟之建十三鎮也  
以爲衛長沙計及丁亥春大兵下楚則諸鎮復起  
而爲盜長沙不能守騰蛟單騎走更爲先璧等所挾  
展轉衡永間尋與侍郎嚴起恒遇走白牙市五月王  
遣中使來密告劉承胤舉狀六月朔詣武岡謁王王  
及太妃皆召見慰勞再三初騰蛟薦承胤由小校至  
大將稱門生已漸倨肆在長沙時徵其兵怒不應馳

入黎平執騰蛟子索餉數萬始以衆至騰蛟不能問  
復爲之請得封定蠻伯且與爲姻由是日益驕固爵  
安國公勛上柱國賜尚方劍翻嫌騰蛟出已上欲奪  
其權自請爲戶部尚書專領餉務王弗許因密召爲  
計而騰蛟固無如承胤何也騰蛟且無兵命以雲南  
援將趙印選胡一青兵隸之及辭朝賜銀幣遣廷臣  
郊餞承胤伏甲將襲之印選一青乃力戰盡殲其衆  
還駐白牙八月武岡破承胤降王走靖州走柳州時  
常德寶慶盡失永州亦再失是冬王還居桂林桂林

止焦璉一軍在騰蛟卽率印選一青等入衛明年戊  
子春加大師晉爵爲侯子孫世襲二月全州破郝永  
忠兵潰奔入桂林逼王西徇縱兵大掠 大兵知桂  
林有變直抵北門騰蛟自永福馳至與留守瞿式耜  
督璉一青等分門拒守閏三月金聲桓李成棟叛  
大清以江西廣東地內附凡我兵之在湖南者姑退  
騰蛟遂克復全州更遣保昌侯曹志建宜章侯盧鼎  
新興侯焦璉新寧侯趙印選攻永州圍城百日大小  
三十六戰十一月朔克之未幾監軍御史余鯤起職

方主事李甲春取寶慶以王進才守之諸將亦取衡州馬進忠取常德所失地多復騰蛟議進兵長沙適督師堵胤錫與進忠有隙惡其兵招忠貞營李赤心軍自夔州至令進忠以常德讓進忠大怒驅居民出城焚廬舍至盡走武岡進才亦棄寶慶走他城守將悉潰去赤心等所至皆空城卽棄之東趨長沙時騰蛟駐衡州聞之大駭檄進忠由益陽至會垣期與諸將爲大會親詣忠貞營邀赤心入衡而部下將士畏怯不護行僅携吏卒三十人往至則赤心已東卽尾

之至湘潭湘潭空城也赤心不宿而去騰蛟乃入居之己丑正月大兵逼長沙知騰蛟居空城遣將徐勇引軍入勇故部下舊將率衆羅拜勸之降騰蛟大叱之遂擁以出至長沙絕粒七日不歿乃見殺永明王聞之哀悼甚至賜祭九壇贈中湘王諡忠烈其子文瑞以蔭官僉都御史

據遺曰忠烈之功偉矣惜乎十三鎮之不力也然若忠貞營將士翻不可以孽也而唾之矣當李錦就撫時自成妻高氏語之曰汝其爲無賴賊何抑

願爲大將也錦請其說曰爲賊則無論已爲將則身旣許國須愛民聽主將節制有歿無二是我願也錦曰諾乃如命此忠烈之所以加禮於高而錦卒始終無異志耳噫吾獨怪闖賊先後兩妻各能以大義自蓋邢則成興平之事忠靖高則成赤心之事忠烈異矣哉賊妻也忠烈所居有神魚井井故無魚忠烈生魚忽滿井五色粲然旣歿井復空黎平人猶能言其處 十三鎮爲傳上瑞勸忠烈以設上瑞得實授偏沅巡撫事而反覆成性棄忠

烈如遺也沅州急上瑞竟出降踰年與劉承胤並伏誅

章曠字于野松江華亭人崇禎丁丑進士授沔陽知州十六年賊陷州城走免謁總督袁繼咸於九江署爲監紀推官從諸將方國安等復漢陽遂攝府事兼署分巡道空城獨守有衛官數人齎諸印將送賊曠收而斬之日夕爲警備尋調荆西道代者李藻至失將士心城復失被劾候訊何騰蛟薦之令戴臯立功福王立左良玉將犯闕騰蛟至長沙以曠爲總督監



軍黃朝宣者故巡撫宋一鶚部將也駐燕子窩張先  
璧以精騎三千屯淑浦騰蛟令曠悉遣召之又令調  
劉承胤兵於武岡闖賊歿其下劉體仁郝搖旂袁宗  
第蘭養成王進才牛有勇六大部各擁兵數萬至騰  
蛟與曠計盡撫其衆軍容大盛良玉歿其將馬進忠  
王允成無所歸突至岳州偏沅巡撫傅上瑞大慰曠  
曰此無主之兵可撫也入其營與進忠握手指白水  
爲誓進忠等皆從之進忠卽賊中渠魁混十萬也南  
都旣覆 大兵逼湖南諸將皆畏怯曠獨悉力禦唐

王擢爲右僉都御史提督軍務恢勦湖北曠有智畧  
行軍不避鋒鏑身挽湘陰平江之衝湘南恃以無恐  
嘗戰岳州以後軍不繼而還已又大戰於大荆驛承  
明王加兵部右侍郎長沙守將王進才與狼兵將覃  
遇春鬪大掠去騰蛟奔衡州曠亦走寶慶長沙遂失  
後至祁陽與騰蛟會時騰蛟將赴武岡謁王乃以兵  
事屬之已復移駐永州警報至諸大將擁兵不顧急  
則棄城走曠力不能贍乃抑鬱而卒  
傅作霖武陵人由鄉舉仕唐王以大學士蘇觀生薦

爲職方主事監紀其軍觀生歿依騰蛟於長沙改監  
軍御史永明王在全州擢兵部左侍郎掌部事尋進  
尙書從至武岡時劉承胤擅政作霖與之善故得驟  
遷 大兵逼武岡承胤議迎降作霖勃然責之及承  
胤遣使納款兵入城作霖冠帶坐堂上承胤力勸之  
降不從遂被殺妾鄭氏有殊姿被執驅之過橋躍入  
水中歿

周震官中書舍人居全州慷慨尙氣節嘗佐騰蛟軍  
武岡失全州危甚乃集文武將吏盟於神誓以歿拒

條陳城守事宜於留守瞿式耜卽題爲御史監全州  
軍亾無郝永忠等諸將撤兵還桂林城中虛守將等  
議舉城降震力爭不可衆怒曳出斬之

蕭慮者武昌諸生爲承胤坐營叅將騰蛟題爲總兵  
官管黎平叅將事承胤旣順命令降將陳友龍招之  
不從已而城破格鬥力竭自剄歿友龍遂盡劫騰蛟  
眷屬以去

繹史據遺卷四終

繹史撫遺卷五目錄

吳郡李 瑤子玉纂

列傳五

瞿式耜 張同敞 堵胤錫

吳 炳 侯時偉

陳象明 廖翰標 梁萬爵

右粵中督輔從事諸臣列傳撫遺第五

瞿堵勲名當時竝駕然一則晉文一則齊桓也  
瞿留守初被靖江之難按部蒼梧亨嘉自率兵  
至執之令易朝服見不從脅以兵亦不動遂奪

其敕印以小艇載回桂林幽諸會丁魁楚遣將  
趙千駟嚴遵誥馬吉翔陳邦傳合兵邀擊亨嘉  
之帥征蠻將軍楊國威也其部將焦璉彙與留  
守謙自幽所陰相結時城守皆璉兵密約邦傳  
縋城入禽亨嘉國威械送福州亂遂定尙書魯  
可藻交素得桂林之圍悉心協力以禦璉歎曰  
文官若此吾儕媿歿已後可藻欲夸所威自書  
總制兩廣留守曰方今武臣多私署督鎮銜妄  
自尊貽笑天下子奈何亦效此果將以威勢示

遠人也盍屬予代請諸朝乎可藻惶恐遜謝卽  
改去比五虎事敗疏掾凡七上又具密揭封進  
太后力護之彼堵總制固有收輯忠貞之勞捍  
衛嶺表之績雖名與何齊實功出瞿下矧夫忠  
君愛友之道而一以至誠行諸真迴乎其不侔  
者已

釋史摭遺卷五

列傳五

瞿式耜字起田常熟人禮部侍郎景淳孫湖廣參議  
汝說子也萬曆丙辰進士授吉安永豐知縣有政聲  
天啓元年調繁江陵永豐民乞畱命再任以憂歸崇  
禎元年擢戶科給事中多所建白輒當帝意爲禮部  
侍郎錢謙益門下士後會推閣臣謙益以同官周延  
儒方蒙眷注慮並推則已絀謀沮之授意式耜言於  
當事者攬延儒弗推而列謙益名第二溫體仁發其

難延儒助之因奪謙益官閒任式耜坐貶復以貴州  
布政使胡平表不謹罷職式耜薦舉不實再貶二秩  
遂廢於家常熟奸民張漢儒希體仁指訐謙益式耜  
貪肆不法體仁主其議逮下獄巡撫張國維巡按路  
振飛交章白其寃不聽及兩人就獄體仁已去位從  
未減削謙益籍式耜得贖徒甲申八月福王起其官  
授應天府丞尋擢右僉都御史巡撫廣西明年夏甫  
抵梧州聞南都亡靖江王亨嘉據桂林謀僭號式耜  
與中軍焦璉謀檄調思恩叅將陳邦傳以兵助密止

狼兵勿應亨嘉調亨嘉至梧乃劫式耜幽之桂林取  
其敕印初式耜有立桂恭王長子安仁王由稷之議  
及唐王監國且謂倫序不當不奉表賀至是自幽所  
遣使遑朝并乞援適亨嘉爲丁魁楚所攻勢窘甚遂  
釋式耜式耜旣出立召邦傳璉等共圖之卽執亨嘉  
送福州亂定唐王擢爲兵部右侍郎協理戎政尋以  
晏日曙來代乃退居廣東丙戌九月汀州破唐王已  
及於難式耜與總督丁魁楚前兵部尙書呂大器李  
永茂等會議立君首禰永明王賢當立遂自梧州迎

至肇慶以十月十五日壬午監國魁楚大器並爲大學士式耜爲吏部右侍郎兼內閣學士掌銓事項之贛州敗報至司理監太監王坤迨王還梧州時坤擅權恣肆銓政軍務任意顛倒吏科給事劉燾抗疏糾之忤旨式耜論救乃免十一月唐王弟聿錫爲蘇觀生所立據廣州此中監國之詔未達而彼登極之詔先頒矣式耜遂與魁楚定謀迎王還肇慶以正位號遣兵科給事中彭耀進諭之竟爲觀生所殺復命兵部侍郎林佳鼎督師出與廣州兵遇於三水全軍覆

沒佳鼎及僉事夏四敷俱歿之十二月望日我

大清命總兵官李成棟襲破廣州擒聿錫肇慶震動式耜請守峽口王坤難之促王出奔爭之不可遂乘輕舟上西峽及式耜趨至王已越梧而西丁亥正月大兵下肇慶逼梧州巡撫曹擘具款降王將走依何騰蛟於湖廣式耜乃激切疏言半年之內三四播遷兵心民心無不惶惑王留則粵留王去則粵亦去今日之勢我進一步人亦進一步我去遯一日人來亦遯一日若去而弗守愚者亦知其拱手送之矣時呂

大器丁魁楚王化澄等皆棄王去止式耜與吳炳吳  
貞毓跋涉相從王由平樂達桂林二月以吳炳爲大  
學士式耜肅殿陛飭守禦請都於此魁楚兵屯岑溪  
大兵招之不從水陸設伏戰於藤江魁楚中箭歿李  
成棟旣定廣東分兵將趨桂林王亟走全州式耜極  
以桂林形勢開陳不納因自請畱守與城存亾許之  
進文淵閣大學士兼吏兵二部尙書賜劍便宜從事  
平樂潯州相繼破桂林危甚總督侍郎朱盛濃巡按  
御史辜延泰布政使朱盛澗副使楊垂雲知府王惠

卿以下皆遁走惟式耜與通判鄭國藩縣丞李世榮  
都司林應昌李當瑞沈煌在焉三月 大兵至桂林  
援將焦璉遇之戰却之五月李成棟薄城下以數十  
騎突入文昌門登城樓瞰式耜公署急令焦璉白貴  
白玉等開城出戰馬之驥鬲江發大砲以助聲勢成  
棟引退已而別有一路由栗木嶺來之驥突出逆戰  
追奔數十里自是桂林獲全當城守時式耜親立矢  
石中與士卒同甘苦積雨城壞吏士無人色式耜壘  
石補闕督守自如俄以援兵索餉括庫且不足式耜



妻邵捐簪珥助之人故無叛志焦璉時已擢叅將初  
永明王居藩服賊陷衡州奔粵西中途被執璉率衆  
攀城破械救諸出王病璉復背負以趨王故念此德  
之也城守最力旣以所部主客不和譁而走城幾破  
會陳邦彥攻廣州大兵遂東璉亦復陽朔及平樂  
邦傳亦由潯合兵復梧州粵勢羸定捷聞封璉新興  
伯式耜臨桂林伯餘各進秩有差式耜請王返全州不  
聽尋又請還桂林已許之秋八月武岡破王由靖州  
假蠻道以達柳州大學士吳炳死之十一月大兵

自湖南逼全州何騰蛟督兵分戰諸將連營亘三百  
里拒却之已梧州復破王方在象州欲走南寧諸臣  
諫阻遂以十二月還居桂林以嚴起恒竝爲大學士  
明年戊子二月南安侯郝永忠駐桂林與城外團練  
兵相惡盡破水東十八村殺戮無算且與式耜構難  
乃力爲調停以安永忠移駐興安與大兵戰靈川  
敗績奔還桂林請王卽夕西徇式耜爭留不可左右  
皆請速駕又力爭之曰督師在楚警報未至宜候之  
還背城借一勝負猶未可知若以走爲策則何地不

危王曰卿不過欲予歿社稷爾式耜泣下沾衣夜半  
王甫行永忠卽四面縱火大掠捶殺太常卿黃太元  
式耜家亦被劫斃家人矯騰蛟令箭始出城日中趙  
印選諸營自靈川至亦大掠城內外如洗永忠走柳  
州印選等走永寧明日式耜救息餘燼安撫遠近焦  
璉及胡一青周金湯兆佐諸鎮兵皆至騰蛟所部軍  
亦至三月 大兵聞變亟來襲抵北門乃與騰蛟督  
諸將拒戰獲全遣使赴南寧慰聞三宮起居王始知  
式耜無恙爲之泣下賜金印一文曰精忠貫日比金

聲桓李成棟皆據地內附成棟具表請王赴廣州式  
耜慮其挾王自專如劉承胤事力請還桂林疏言駕  
若東幸軍中將帥謂朝廷樂新復之土成棟亦有邀  
駕之嫌號令旣遠人心渙散臣不能制也再疏令簡  
討蔡之俊進迎又疏令給事中蒙正發進迎俱不報  
王竟由南寧移駐肇慶成棟疏稱式耜擁戴元勛不  
宜久在外請召還使者數至式耜因辭乞骸骨不許  
遂以國事讓成棟已請留守桂林十一月永州寶慶  
衡州相繼恢復卽疏言機會可乘請仍還桂林圖出

楚計不納慶國公陳邦傳守潯州自稱世守廣西欲  
如黔國公例式耜劾之廣西巡撫魯可藻自署銜爲  
巡撫兩廣亦奏駁之式耜身在外凡政有所闕必論  
諫嘗曰臣與主上患難相隨休戚與共較他臣不同  
一切大政自得與聞王爲褒納是時成棟子元胤專  
朝政頗知敬禮式耜如袁彭年丁時魁金堡輩咸相  
倚附己丑春正月時魁輩逐朱天麟不欲何吾騶爲  
首輔召式耜入直以文淵閣印畀之終不入未幾騰  
蛟被執湘潭成棟聲桓俱敗沒國勢大危夏六月以

戎政張同敞總督各路軍馬秋九月

大清命帥定南王孔有德抵衡州同敞馳赴全州爲  
禦從式耜之請也庚寅春正月南雄破羅成耀遁韶  
州亦失王愬西走梧州式耜馳疏請留不聽時我帥  
平南王尙可喜靖南王耿仲明久頓江西之吉安府  
惠潮道李士璉鎮將郝尙忠密遣投誠導之入龍虎  
關式耜飛章入告而朝士方植黨相角尙書吳貞毓  
輩疏劾袁鵬年等五虎把持朝政罔上行私皆下錦  
衣衛獄式耜聞之疏凡七上申揀備至又胡執恭之

擅封孫可望也疏請斬之皆不報秋九月全州破開  
國公趙印選居桂林衛國公胡一青寧遠伯王永祚  
守榕江皆惶懼不出 大兵遂入嚴關十月一青永  
祚俱赴桂林領饗榕江一帶遂爲空壁 大兵入益  
深十一月五日式耜檄印選出城爲戰守計不應再  
趣之則盡室逃一青及武陵侯楊國棟綏寧伯蒲纓  
寧武伯馬養麟等馳出小路勒兵兵自潰迺各逃去  
永祚迎降城中空無一卒式耜端坐府中家人亦檄  
總兵戚良勳操二騎至請乘之邀走爲後圖堅弗許

曰爾去則去我去不過多活幾日自古至今誰不死  
者良勳乃去俄總督張同敞自靈川回入見曰事急  
矣將奈何曰封疆之臣身將焉遑子無留守責盍去  
諸同敞曰死則俱死耳乃呼酒對飲四顧茫然祇一  
老兵侍命急召中軍徐高高至以敕印付之屬星馳  
送王是夕兩人秉燭危坐黎明有數騎進式耜曰吾  
兩人待死久矣偕之出抵大營見定南王孔有德有  
德舉手曰誰爲瞿閣部先生式耜曰某是也城旣陷  
惟求一歿有德曰吾斷不殺忠臣閣部毋自苦吾掌

兵馬閣部掌糧饟一如前朝事曰某爲天朝大臣豈與汝供職有德曰吾且先聖裔勢會所迫以至今日閣部何太執同敵厲聲曰爾不過毛文龍下走耳毋辱先聖有德怒叱左右縛之式耜曰此宮詹司馬張某來與我同歿者不可辱遂命釋縛還其衣冠命之坐式耜堅請歿有德遣官守護居於別第勸令薙髮不可令爲僧亦不可曰爲僧者薙髮之漸髮短命長我不爲也兩人日賦詩倡和得百餘首至閏十一月十有七日將就刑從容蕭衣冠南向再拜訖至風洞

山下飲刃歿同做大學士居正孫有文武才每戰輒躍馬獨出爲諸將先年四十無子妻早卒蕭然一榻而已至是竝見殺

撫遺曰瞿留守居臺諫日矯矯樹名搏擊權豪大臣多畏其口嘗頌楊漣魏大中周順昌爲清中之清忠中之忠三人遂得賜諡陳時務七事言起廢不可不覈陞遷不可不漸會推不可不慎諡典宜嚴刑章宜飭論人宜審附璫者宜區分又極論館選奔競之弊乞臨軒親試比將定逆案請盡發紅

本準其情罪輕重帝多嘉納桂林殉節日天大雷  
電空中震擊者三遠近稱異時金堡已薙髮爲僧  
名澹歸上書定南乞收瘞瞿張二人遺骸不報吳  
江人吳稅密具衣冠殮之葬於北郊之原

堵胤錫字仲緘無錫人崇禎丁丑進士除南京戶部  
主事遷郎中外授長沙知府山賊擾境督鄉勇破滅  
之又殺醴陵賊渠遂以知兵名福王授湖廣參政分  
守武昌黃州漢陽左良玉稱兵總督何騰蛟奔長沙  
令胤錫攝湖北巡撫事駐常德唐王立拜右副都御

史實授巡撫李自成歿衆推其兄子錦爲主奉自成  
妻高氏及高弟一功驟至澧州言欲乞降號衆三十  
萬遠近大震胤錫議撫之騰蛟亦馳檄至乃躬入其  
營開誠慰諭稱詔賜高氏命服錦一功蟒玉金銀器  
厚犒其軍皆踴躍拜謝就軍中宴之導以忠孝大義  
數千言明日高氏出拜謂錦曰堵公天人也汝不可  
負別部田見秀劉汝魁等亦來降唐王大喜告廟加  
兵部右侍郎兼右僉都御史總制其軍手書獎勞李  
錦賜名赤心授御營前部左軍一功賜名必正爲右

軍並挂龍虎將軍印封列侯他部帥封賞有差號其  
營曰忠貞封高氏貞義夫人賜珠冠綵幣命有司建  
坊題曰淑贊中興嘉獎甚至亂錫遂與赤心等深相  
結倚以自強已而袁宗第劉體仁諸營先歸騰蛟者  
亦引與赤心合衆日益盛亂錫以芻糧難繼令楸處  
江北就食明年丙戌正月騰蛟大舉期與諸軍盡會  
岳州獨赤心先至餘皆逗遛卒不能進永明王立進  
兵部尚書總制如故丁亥春王令赤心等攻荊州月  
餘大兵來援赤心等大敗步走入蜀數日不得食

乃楸入施州衛言就食湖南時王在武岡劉承胤懇  
爲赤心所并計非亂錫不能禦乃加東閣大學士封  
光化伯賜劍便宜從事承胤欲殺騰蛟胤錫疏劾其  
梟八月武岡破寶慶常德辰沅俱失亂錫走永順土  
司尋赴貴陽抵遵義乞師於皮熊王祥又入施州請  
忠貞營軍會楚宗人朱容藩僞稱監國天下兵馬副  
元帥擅居夔州御史錢邦芭傳檄討之戊子正月胤  
錫見容藩責以大義曉譬利害楸其黨頃之金聲桓  
李成棟據地歸附於是馬進忠王進才李赤心高必

正等乘間取常德桃源澧州臨武益山道州靖州荆  
門宜城諸州縣進忠赤心必正等皆封公亂錫與進  
忠有隙令赤心必正爭其所取常德地進忠怒盡焚  
廬舍而去赤心等至見空城棄之引兵而東所至守  
將皆燒營棄城走湖南所復州縣爲之一空亂錫乃  
率赤心等人湘潭期與騰蛟會騰蛟後至己丑正月  
騰蛟在湘潭被執諸軍遂赦赤心等潰於茶陵由道  
州走廣西緣路剽斂亂錫與胡一青守衡州尋亦戰  
敗走桂陽初赤心等人廣西龍虎關守將曹志建惡

其淫掠并惡亂錫或言亂錫將召忠貞營圖志建志  
建益恨卽夜發兵圍之殺其從者千餘人亂錫及子  
逃入富川猺峒志建索之急猺思潛出亂錫於監軍  
道何圖復圖復送之間闕達梧州時王在肇慶遣大  
臣嚴起恒及劉湘容來安輯忠貞將士至則赤心已  
走賓橫二州間乃載亂錫以謁王而志建遷怒圖復  
誘殺之闔門俱盡是時馬吉翔與李元亂皆專柄各  
樹黨援亂錫至與吉翔交歡激赤心等東來與元亂  
爲難移書桂林畱守大學士瞿式耜託言奉密敕令



與共圖元胤王聞頗不悅元胤黨丁時魁金堡又論其喪師失地乃令總統兵馬移駐梧州後自以赤心等不足恃欲遙結孫可望爲強援矯詔封可望平遼王旋詣潯州十一月自恨發病歿贈潯國公諡文忠撫遺曰君子守經行權處乎離亂崩摧之季原不可執以平論然觀總制之所爲而不能無議焉當其於賜劍得便宜後嘗疏請空敕百道自鑄印信頒給秦中諸路之舉兵者專也先澧州受降日稱詔賜高氏命服錦與一功蟒玉金銀器稱詔云者

矯也然此矯與專猶謂之迫於疆理時勢也旣而與進忠交惡圖快已私令忠貞之衆爭其城卒致諸將所復土地人民焚棄一空全楚大局從此決裂末復坳黨構難假敕爲間妄樹強援屢詔與封則更作奚說雖至自恨病發而厥孽已莫追矣夫春秋責備賢者吾於堵公不能不進一詞曰譎赤心旣受官書疏間猶稱自成爲先帝高氏爲太后總制顧與之暱竟不能一言規止有明之世闖亂天下者二十年君國銷沉湖山碎裂洎至

皇朝應運綏定萬邦歲星未周而闖已投馘九宮  
矣其妻也從子也固給諫金道隱之所謂國讐也  
當其時撫之固不容已矐之烏乎爲可綽楔表題  
而必曰淑贊中興亦思中興之頌何事而起邪道  
隱之責總制曰勞則有之功於何有亦未始非正  
論況且有失地喪師之咎在



吳炳宜興人萬曆進士授蒲圻知縣歷官江西提學  
副使江西失流虜廣東永明王擢爲禮部右侍郎從  
至桂林令以本官兼東閣大學士入直仍掌部事又

從至武岡警報至王蒼卒奔靖州命炳扈王世子奔  
城步吏部主事侯時偉亦從之時偉公安進士歷官  
考功主事既至城已爲大兵所據同被執說之降  
不屈械送衡州炳不食自盡於湘山寺時偉補官纔  
數月也亦歿之

陳象明字麗南東莞人崇禎元年戊辰進士授戶部  
主事權稅淮安以清操聞歷遷饒州知府忤巡按被  
劾謫兩浙運副累遷湖南道副使唐王時令徵餉廣  
西永明王立粵地盡失象明檄調土兵與陳邦傳連

營東至梧州榕樹潭遇 大兵戰敗歿之

廖翰標龍門破里人天啓中舉於鄉官江西新城知縣以廉惠稱民爲建祠及廣東之失也以二幼子託於從父從容自縊歿番禺有梁萬爵者唐王時舉人兵至與城守旣破乃歎曰此志士盡節之秋也遂赴水歿



釋史撫遺卷五終

天啓製

